



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7

New Zealand nung tang mezüngbuba nisung 200 dak corona putet

Sangküm May ita tashi angati rasion agütsütsü: Arvind Kejriwal

VOL. XIX ONO. 30 (ADOK 30)

DIMAPUR

AMUNGNÜ (SUNDAY)

YIMPOKSÜI (NOVEMBER) 07, 2021

₹ 5.00



'Miss Mokokchung 2021' Kr. Moasenla (tiyong) den 1st Runner up Kr. Arentila Azukumer (abelen) aser 2nd Runner up Kr. Alemnungla noksa nung angur. Taküm iba sentong Forerunners teloki Mokokchung town hall nung ayongzük. Subtitles senpet: Miss Talented: Ninotoli Aye, Miss Runway: Moasenla, Miss Beautiful body: Alemnungla, Miss Photogenic: Supongrenla Longkumer, Miss Beautiful Skin: Limisela

Sorkar ketdangsübaren nung Manipur tamajungtiba; Nagaland jenjang 4 buba nung lir

Guwahati, November 6, 2021 (Agencies): India nung sorkar junga ketdang masüba state ji Manipur ta Public Affairs Index-2021 report nung shia lir.

Iba ya Bengaluru nung amenoka aliba Public Affairs Centre (PAC) ajanga bushitetba lir.

PAC ajanga state aser Union Territory tem nung sorkar ketdangsübaren asadanga liasü. Parnoki onük asem- sustainable development-equity, growth aser sustainability nung asadang.

Sorkar junga ketdang masüba state tilatem rongnung Nagaland jenjang pezübuba nung lir.

State tilatem rongnung sorkar junga ketdang asüba Sikkim, Goa aser Mizoram lir.

Taküm küm PAC-i COVID-19 response index nung temolung agütsü aser state shiai wara atema inyakbatem asadanga liasü.

"Public Affairs Centre ajanga state tem nung sorkar ketdangsübaren asadangogo. State tulutem rongnung Uttar Pradesh tatembangba aser state tilatem rongnung Manipur tatembangba lir. Iba ya Centre aser State nung BJP aliba: 0+0=0 lir" ta Manipur atema AICC observer, MP Jairam Ramesh-i metetdaksü.

Mangkolemba nung Tzüdayong ward yimteni lenmang yanglushi

Mangkolemba, November 6, 2021 (TYO): Mangkolemba nung Tzüdayong ward ajanga Government Higher Secondary school lenmang aoer aser iba lenmang küm shia anaben-aseben tashi ward nung alirtemi yanglushia arur.

November 6, 2021 nü Ward yimteni ayongzükä nübo noklang tema medem-medema adenshir iba lenmang kanga junga yanglushio.

Joko küm ter shi iba lenmang yimteni-ward nung alir ayongzükä yanglushia arur. Kiyong nung alir tulu tila ajungai küm shia pei akokba agi yaritepa lenmang anepalua arur.

Tzüdayong ward nung alirtemi iba lenmang ya meyanglushi dang toküsü nungbo GHSS Mangkolemba nung azünger kaketshirtem aser yangji inyaktertem koma senzüsensongtsü ta aiben bilemer aser tasüngdangba arur ta iba kiyong nung alir kati ashi.

"Sorkarji nübor aser nüborji sorkar ta tangatetba nung nübori kümsa küm lenmang yanglushia aser anepalua arudang sorkaria koba

tashi ka nübor timtem reprangteta inyaker aser inyaksü sentong lir?" ta paisa asüngdang.

"Nüboritemi lenji arua yaritepdang sorkaria ochishia itinyaksü timbo inyaksüla. Talisa iba lenmang nung kaketshirtemi anogo shia senzür ta angateta mongpu ajak nung timtem makai senzütetsüsa yangludaksünür" ta Tzüdayong ward nung alirisa mepishia metetdaksü.

Iba lenmang yangluba nung yariteper ajak dang yimteni pelaba metetdaksüogo.

Talisa Wb. I. Kumzuk, Loyong ward pai dumper aser ali atuba machine (poclain) tenla tulu angati dang anogo tepiyong lenmang yanglushidang amshitsü atema agütsüba atema pelar ta yimtenisa shisem.

Ali dumper load 50 shi bendena yutsüba ajanga Honibarnü ward nung alirtemi lenmang kanga mejungi raksar aliba kanga junga asükwa mongpu atema-bo yanglutsüogo.

MLA Dr. Chumben-i sobaliba wazüka ayutsü ayongzük

Dimapur, November 6, 2021 (TYO): Wokha local ground nung yashi nungi Tokhu Emong cum Mini Hornbill Festival, 2021 amonger aser November 6, 2021 nü MLA, Dr. Chumben Murry-i tetushi süa jaoker ka ama shilem agi.

Dr. Murry-i Tokhu salem ashidang "iba anogo ya medemertem moatsüba, tatok agütsüba aser tenüngsang

agütsüba mapang ka lir" ta ashi.

"Oboula nungeri sobaliba takar yutsüba lanu putui agizüka amshitsüla aser mesamadaksütsüla" ta paisa ayongzük.

"Iba benjung amongba ajanga nisung ajaki tatok agütsütsüla aser aibelena inyaksebatem amadoktsü ayongzük" ta Dr. Murry-i ashi.

(Maneni tapak 10 nung...)

COVID-19 Nagaland: 17 dak putet, 13 taneptsü angu & 1 asü

Kohima, November 6, 2021 (TYO): Nagaland nung Honibarnü nisung 17 dak COVID-19 putet, 13 taneptsü angu aser ka asü.

"Tanü putertemji Dimapur nung 13 aser Kiphire, Kohima, Mokokchung o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tesüiba ghonda 24 tsüngda Covid-19 puteta alir nisung 13 taneptsü angu. Parnokji Dimapur nung 9 aser Kohima nung 4 lir" ta paisa ashi.

Nisung 31,922 rongnungi 29,998 taneptsü nguogo aser ibaji taneptsü angur 93.97% lir, ta Dr. Kikon-isa shisem.

Tang nisung 188 anepaludar saka parnok 154 dakbo shirangba yimya kecha mali, ta paisa ashi.

Dimapur nung COVID-19 puteta alir ka asüba züngsema tasür ajak agi nisung 689 kümogo, ta Dr Kikon-isa metetdaksü.

"Hokolbar tashi nung nisung 713,801 nem COVID-19 vaccine indang dose 12,17,940 agütsüogo" ta State Immunization Officer, Dr Ritu

Thurr-ia ashi.

"Vaccine agirtemji frontline workers 60,963, healthcare workers 15,998, arishi küm 45 ser temapur 202,863 aser arishi küm 18 nungi 44 tsüngda alir 433,977 lir" ta paisa ashi.

"Vaccine agirtem rongnung nisung 504,139-i dose anaprong agiogo. Parnokji frontline workers 48,068, healthcare workers 13,430, arishi küm 45 ser temapur 163,723 aser arishi küm 18 nungi 44 tsüngda alir 277,080 lir" ta Dr Thurr-isa metetdaksü.

Taoba Nagaland CM SC Jamir-i PM Modi den ajurutep



Honibarnü taoba Nagaland CM SC Jamir-i Prime Minister Narendra Modi den ajurutepdang agiba noksa angur.

New Delhi, November 6, 2021 (Agencies): Taoba Nagaland Chief Minister aser Congress lenir tejen SC Jamir-i Honibarnü Prime Minister Narendra Modi den ajurutep.

Iba osang ya PM Modi-i Twitter nung noksa kar dena lemsatep.

"Taoba Nagaland CM aser akhümsüba aliba politician SC Jamir den ajurutepba atema pelar.

Künati onük aika atema tebilebatem lemsatepogo. Pai 2009 küm Gujarat nung governor inyak aser iba indang otsü kar lemsatep" ta PM Modi-i ashi.

North East lenir tejen SC Jamir ya Nagaland nung Chief Minister punguben tashi inyakogo aser state aika nung governor inyakogo.

2020 küm Centre sorkari pa nem Padma Bhushan agütsüogo.

Tawa by-election agiba indang result adokba sülen SC Jamir-i Prime Minister Modi den ajurutep.

Nagaland nung Shamator Chessore assembly indang by-election nung Nationalist Democratic Progressive Party candidate K Keoshu Yimchunger den tetokteper shinga melii takok angu.

Advisor Tovihoto-i CISHR nung Sub-Station lapoktsü DEC 2023 TASHI NUNG PRE PAID METERING SYSTEM ENOKTSÜ



November 6, 2021 nü CISHR Dimapur nung power sub-station lapoktsü sülen Power Advisor Tovihoto Ayemi den power department ketdangsürtem aser Diphupar Village Council züngsemtem o GBs külemi agiba noksa angur. (Dimapur, November 6)

Dimapur, November 6, 2021 (TYO): November 6, 2021 nü Power Advisor, Tovihoto Ayemi-i Christian Institute of Health Sciences and Research (CISHR), Dimapur nung 10 MVA Sub-Station ulushiba lapoktsüogo.

"CISHR nung sub-station lapoktsü ya department, mozi ki aser meketa aliba tesemtem atema mapa tulu ka inyaktetba lir. Terenlok mapa, reju aser jilatem tejakleni aotsü atema power supply tajung alitsüba kangasa tongtipang lir" ta Tovihoto-i ashi.

CISHR ya Dimapur nung mozi tajungtiba rongnung ka lir aser technology tasentem lir. CISHR nung yipden talila 200 bendenlokba den power supply shita agütsütsü atema sub station alitsüla, ta paisa metetdaksü.

"December 2023 tashi nung ki ajak nung pre paid metering system enoktsü. Iba ya

consumers atema tajangzük lir kechiyong peii atsükba atema dang sen agütsütsü. Iba inyakyim ajanga pei budget dak alangba ama power alitsü, mapang kümzüktsü aser aibelena bill anguba anentsü" ta Advisor Tovihoto-isa ashi.

Nisungtemi pei kidang pre paid metering system enoktsü atema renema alitsü ayongzük. Power Department-i Social Media sabang ka lapoktsü aser iba nung public-i khuret aser osangtem agütsütsü akok, ta paisa ashi.

"Industries and Commerce dak alia Medical aser Education sector atema power supply shita alitsüba kangasa tongtipang" ta Chief Engineer, (D&R) Er Moa Aier-ia ashi.

"CISHR aser iba meketa aliba tesemtem nung power talila nungdaker aser tarutsü nung power infrastructure atema ali shima lir. Asenok tsüngda amalitep

melira, teka ka agi dangbo mapa meinyaktetsü anungji kati ka yaritepdi" ta Er Moa Aier-isa ashi.

"CISHR-i health care technology tasentem amshia nüboritem anepaluba mapang ka nung Power department-i sub-station tuluba küm daksüba atema tenüngsang agütsür" ta MS, Referral Hospital, Dr Clement Momin-ia ashi.

"Department-i akokba tashi temelenshi bener arutsü aser tajungba akümsü meranger. Iba nung nüboritemia power supply atsükba atema sen shita agütsütsüla aser power auya agiba anema rara nung yaritepsüla" ta Chief Engineer (T&G) Er. Penrithung Yanthan-ia ashi.

Er. Tiameren Walling-i technical report agütsüdang "iba mapatong ya 2018 küm Power Grid Corporation ajanga tenziük aser Rs 1.98 crores endoka yanglu" ta ashi.

Iba mapatong ya Ministry of Power aser Government of Nagaland nati World Bank nungi teyari agia inyak, ta paisa metetdaksü.

Iba sentong nung mendenji SE (E) Dimapur Electrical Circle, Er. Nitovi Wotsa liasü, Sumi Baptist Church Diphupar Associate Pastor, Jacob Achumi-i temoatsü meshia sarasadem aser Executive Engineer, Dimapur Electrical Division, Er. Y. Akito Sema-i anküp tepela o jembii.

ASTG & AKTG Platinum Jubilee takok ngua mongogo



Tongpok, Advocate

Longrineken, Advisor

Limasunep

Dimapur, Yimpoksüi/ November 6 (TYO): Tsüingrem dang asüingdanga atemzükä aliba anogo 4th November 2021 anogo nung Ao Senso Telongjem Guwahati & Ao Kaketshir Teleongjem Guwahati Platinum Jubilee Sentong Shilpgram auditorium, Panjabari nung kanga temoatsü aser takokba nung mongogo.

Anepdang Ao Senso Telongjem Guwahati sentong agi aser iba nung Tongti Tejaoker Wabong Limasunep Jamir, IPS, IGP (Range) Kohima Nagaland liasü. Jubilee omen "TELONGJEM NUNG TEJAKLENI" ta asuba onük nung ajemdakar jembidang, pai asen tsürabur aika arua iba Guwahati yimti nung shisatsü ngur külen asen Naga nunger loktiliba nung terenlok aser temelenshi bener arua tejakleni aniba item temoatsütem lemsatep.

Tanü ama kara melenshia ainba lima ka nung asen sobaliba koda wazükä ayutsü aser asen loktiliba telongjem nung tejakleni ochi nung anitsu pai ajungshi. Lanurtem asen sobaliba tajung nung koda anitetsü, iba asoshi mangdang akaba senso tajung kaka asütsü Jubilee monger ajak

ayongzükä liasü. Nikongtsütsü sentong Ao Kaketshir Teleongjem Guwahati Sentong agiba mapang sentong reraketsür Wabong Dr. Longrineken Advisor National Highway, Treasuries & Accounts. Govt of Nagaland liasü. Tayongzükba o jembidang pai "Tanü lanurtem kwika Guwahati yimtiba nung arua kaketshisatsü bushidagi, nenok kanga temoatsü, kechi aser tanü alimaji unemployment agi sünga lir ajasü nung lanurtemshia pai tazüingba nung skill based aser jenjang tajungtiba ngutetsü asoshi iba yimti nung expert balala nungi angazükä pai nükjidong tongtetsü nükla yur meranga bushitsü la," ta shia kaketshirtem ayongzük.

Tongti O Jemir Wabong Tongpok Pongener, Advocate Guwahati High Court (Kohima Bench) Nagaland ajanga "TEYAKYUK ALIZUNG TONGTETBA LANUR KA" ta asüba onük nung ajemdakar koda asen tsüraburtem Aruju nung azükoka aser tesayuba balala agüja teyakyak kümdaktsü, item ajanga parnoki taküm tongpang ajak

nung takok ngua litet, yamaji tanü tensa nung lanurtemia iba kasa tazüokba nung pei tekolok, temang teyakyak den külemi pei tanela jenjang den sütep sütepba aintsüji asen alizüing nükla asütsüla ta sentong nung atener ajak ayongzük.

Jubilee Sentong ana prongla nung temulunglemmeta inoktsüba ama ajaki shilem tajung agia liasü aser iba sentong nung Ao Senso Union Shillong, Naga Student Union Guwahati, Eastern Naga Student Union Guwahti aser ano Guwahati nung Naga kin Student Union balala nungi arua aden. Iba sentong nung nisung 200 dak tema arua shilem agi.

"Sentong ajak takok anguba asoshi Tsüingrem tenüing asanger aser iba den Guwahati nung dang telidak, lir aortem aser temeimertemi sarasadem, nübu den külemi tenla tulu agütsüba ajanga iba sentong tokok ngutetogo. Nenok kija aser kibongtem ajak dang Planning Committee tenüing nung pelaba lemsateper. Tsüingremi nenok ajak moajang," ta Convenor, Planning Committee, Rev. Toshihira-i sangdong ka ajanga metetdaktsü.

Kohima DC-i metetdaktsür

Dimapur, Yimpoksüi/ November 6 (TYO): October 18 nü okadak ajanga tetuyuba agütsüba dak ajemdaker Deputy Commissioner, Kohima, Gregory Thejawelie, NCS-i, COVID-19 agi asür

kinungertem dang, Ex-gratia forms (Annexure -A) aser tenüingdakba kuli kakettes atema checklist, Deputy Commissioner, Kohima, DDMA Cell Office nung office mapang angutsü, ta metetdaktsüogo.

Committee on Petition senden November 24 nü amentsü

Dimapur, Yimpoksüi/ November 6 (TYO): MLA aser Committee on Petition, Nagaland Legislative Assembly mendenbuba Toyang Chang-i Committee senden November 24 nü amentsü lateter aliba metetdaktsüogo.

Iba senden ya 11:00 ako nungi tenzükä Assembly Secretariat, Committee Room nung amentsü. Committee züingsem ajak dang iba senden nung aru shilem agitsü, mendenbubaisa metetdaktsüogo.

Dimapur DPDB senden November 9 nü amentsü

Dimapur, Yimpoksüi/ November 6 (TYO): Deputy Commissioner aser Vice chairman DPDB, Dimapur, Rajesh Soundarajan-i ita shia amenba Dimapur District DPDB senden November ita atema

November 9 nü DC Conference Hall nung 11:00 ako nungi tenzükä amentsü, ta metetdaktsüogo. Iba senden nung züingsemtem ajak tamakok maludaktsü jangrabangra arua adentsü, DC-isa metetdaktsüogo.

Kinunger yimtsüing nung metsüjangnatsü lemtsü



Dimapur, Yimpoksüi/ November 6 (TYO): Agriculture Technology Management Agency (ATMA) Ongpangkong South Block, Mokokchung-i, India nüjiso ngur küm 75 ajungba nungtem nung November 5 nü Kinunger yimtsüing nung Kisan Goshti & Field day sentong den repsema asükwa tsünüba metsüjangnatsü lemtsüba sentong ka ayongzükä agiogo.

Lipokrenla Pongen, ATM, Ongpangkong South Block, Mokokchung nati tsüingküm shidak nung asükwa tsünüba metsüjangnatsütem tsünütsü koda tongtibang, iba indang metetdaktsü. Tenatisa FIG tem nem lemtsüba metsüjangnatsütem koda anepalutsü, iba indang tangazükba agüja liasü.

Iba sentong ya Kinunger yimtsüing nungi Asungsashi aser Lomonger FSG den longjem agia liasü. Sentong nung shisalen agütsür Bendangkumzuk, BTM aser

Iba sentong nung Coriander, Broccoli, Knol Khol, Turnip, Radish, Carrot, Onion, Cauliflower, Cabbage, Chinese Cabbage, Pokchoy aser Sweet corn nunger amala metsüjangnatsütem aluyimertem nem agüja liasü.

3rd Quarter District Review senden menogo



3rd Quarter District Review senden nung Dr. R. Chubala Aier, CMO Mokokchung-i o jembiba mapang tangokba noksa nung angur.

Dimapur, Yimpoksüi/ November 6 (TYO): 3buba Quarter District review senden November 6 nü Chief Medical Officer Office, Mokokchung indang Conference hall nung menogo.

Chief Medical Officer, Mokokchung Dr. R. Chubala Aier-i senden nung shilem agirtem ajak pelashishia agizük aser parnoki bendanga agüja meranga inyakba atema tenüingsang agüja liasü. Lai, senden nung dena alirtem dang

maneni kümüküma alitsü ayongzük, kechiyong COVID 19 tashida tanem tanemi prokshia odar, ta ashi. 3buba review senden ayongzükba nükjidong indang jembiba mapang lai, Bio-medical waste management & infection Control onük nung ajemdaker sensak asemtsü ta ashi.

COVID 19 vaccine agütsüba dak sendakba nung lai, tanabuba dose ano aika magütsüjem lir aser maparen aika anüingdaka lir, ta ashi. Iba dak sendakba nung lai

ki shiai tua vaccine agütsüba sentong benoka inyaktsü pusama liasü. Laisa, Medical officers tem dang mapangshia health centres tem achaayanga asadanga alitsü tuyu, ajita asünungdang timtem aser tetsükdaktsütem jangjatsü, ta ashi. Sorkari health infrastructure ajungketsü atema rangloker inyakdar asünung lai, stake holders tem den longjem inyaktsüji health care workers tem khuret lir, ta ashi.

Senden nung Programme Officer, NVBDCP & DSO,

Mokokchung Dr. Tiasunep-i, Mokokchung District nung COVID 19 tensa indang metetdaktsü. COVID 19 indang statistical data ka lemsatepba mapang pai, district nung tashidak tendangdak 77 lir ta metetdaktsüba den 2021 tanabuba quarter nung anogoshia aser hopta shia tashidak potetba jenjang aser tashidak agi asürtem, küm, gender aser comorbidity indang osang tejanga agütsü.

lemsatep. Lai, gap analysis, score card generate asüba, format aser quality assurance cycle dak sendakba nung inyakyimtem lephshia metetdaktsü. Laisa, Root cause analysis, action planning aser methodology indang lemsatepa liasü.

Kasa mapang nung MO, RBSK (Rashtriya Bal Swasthya Karyakram) Mokokchung Dr. Imsongienla-i, RBSK indang screening process/mechanism aser September aser October ita Anganwadi Centre aser sorkar school tem nung inyakyim balala benoka inyakba indang metetdaktsü.

Maneni NUHM Consultant Sentirenla Longchar-i, SWOT analysis indang power point presentation ka agütsü aser, DMHP IMDH Psychiatric Nurse Akumjungla-i, inyakyim balala indang metetakja liasü.

MO, Mongsenyimti PHC Dr. Maongkala-i, Gap analysis aser Action planning indang

Senden nung SMOs & Mos ajaki Bio-medical waste management aser infection control aser iba dak sendakba nung tetsükdaktsütem aser tinyaktsü mapatem indang power point presentation agüja liasü.

Senden nung Programme Officers, Senior Medial Officers, Medical Officers, DPMU staff, NHP, RBSK aser IEC ajak dena liasü.

Meghalaya Cabinet-i district tasen ka kümtettsü agizük



Meghalaya nung district tasen ka kümtettsü atema state Cabinet senden amenba noksa nung angur.

Shillong, November 6, 2021 (Agencies): Meghalaya nung district tasen ka kümtettsü atema state Cabinet-i Hokolbarnü telemtetba agiogo. Cabinet-i Mairang civil sub-division nungi district akümtsü molunga agizük. "District tasen dang Eastern West Khasi Hills district ajatsü" ta Deputy Chief Minister Prestone Tynsong-i ashi.

Mairang ya West Khasi Hills district kübok sub-division ka liasü. "Mairang Civil Sub-Division nungi district akümtsü tanü Cabinet-i agizükogo. Iba dang Eastern West Khasi Hills ta ajatsü aser November 10, 2021 nü lapoktsü" ta Chief Minister Conrad Sangma-i ashi. District tasenba atema senotsü endoktsü atema

asüngdangdang "sorkari department dang maparen inyaksü shiogo aser sangküm state budget nung ibaji enoksemtsü" ta Tynsong-i langzü. District tasen kümtetba ajanga nübortem asoshi administration tajungba akümtsü aser scheme aika takok ngua inyaktettsü, ta paisa metetdaksü.

Mizoram nung tanur 162 dena nisung 513 dak Covid-19 putet

Aizawl, November 6, 2021 (Agencies): Mizoram nung tanur 162 densema nisung 513 dak novel coronavirus aliba putetogo. Parnok züngsema nisung ajak agi 1, 24,539 kümogo. Külen, COVID-19 puteta alir nisung 5 asüba züngsema tasür ajak agi 445 kümogo, ta health ketdangsür kati ashi.

Tang Mizoram nung nisung 6,044 anepaludar aser Hokolbarnü nisung 605 taneptsü angu. Parnok züngsema taneptsü angur ajak agi nisung 1, 18,050 kümogo. COVID-19 nungi taneptsü angurji 94.78% lir aser tasübaji 0.35% lir ta ketdangsürisa ashi. Mizoram nung sample lakh 13.38 tema tendangogo aser iba

nungi Hokolbarnü sample 5,577 tendang, ta Integrated Disease Surveillance Programme (IDSP)-i ashi. "Hokolbar tashi nung nisung lakh 6.98 tema nem vaccine agütsüogo aser parnok rongnungi lakh 5.23-i dose anaprong agiogo" ta state immunization officer Dr. Lalzawmi-i ashi,

Pradyot Debbarma-i Tipra Motha chairman toktsütsü molunga lir

Agartala, November 6, 2021 (Agenceis): Tripura chuba jabaso Pradyot Bikram Manikya Debbarma-i telongjem atema Tipra Motha nung chairman menden nungi anentsü molunga lir ta metetdaksüogo. Debbarma-i taoba mapang Tripura Congress president inyakogo aser Hokolbarnü pai Tiprasa aser political party ajak tsüngda telongjem lidaktsünür

ta ashi. Debbarma-i Tiplaland balaka kümtettsü atema takhangba agütsür. "Asenoki 'Greater Tiplaland' atema longjemtsüla" ta pai ashi. "Ni Tiplasa nung tsüngda telongjem adokdaksünür. Ni party ajak dang Greater Tiplaland atema longjemtsü mepishir. Asen nübor tarutsü atema party tenung, menden menüngdaker. Nüngdak dang

süra telongjem adoktsü atema ni Tipra Motha indang Chairman nungi anentsü molunga lir" ta Debbarma-i Hokolbarnü ashi. Administration-i Santirbazar nung tokteptsü atema Tipra Motha regional party nem temelaba magütsü ta November 3 nü Debbarma-i tai tongloksü. Ruling party-i nomination mesüdaktsütsü atema Tipra Motha nem tenokdangba agütsü, ta paisa ashi.

Assam Congress-i Model House Rent Act aitsür

Guwahati, November 6, 2021 (Agencies): Assam nung Centre sorkari yangluba Model House Rent Act tashiyim agi benokba aitsür ta Assam Pradesh Congress Committee-i Honibarnü metetdaksüogo. "Iba ya nübortem anema yangluba 'Act' ka lir aser state sorkari Assam nung alenbangtsü meranger" ta Spokesperson Kushal Kr. Sharma, Mayor aser Ex Senior Spokesperson Assam PCC Mehdi Alam Bora nati osangbener dang ashi. Iba Act ajanga ki kibur (Owner) aser talir (tenant) nati ki para indang osang dennür tenangzükyep agiba sorkari website ka nung nung upload asütsü aser iba ajanga sorkari Identification number ka agütsütsü. "Iba Central Act ya kechi südir süaka amshitsüla ta masü saka Chief Minister-i Modi peladaktsütsü atema molunga agizük" ta Congress spokesperson temi ashi.

Iba ya mapa küma inyakra, ki kiburi (House Owner) state sorkar nem ki para nungi shilem ka agütsütsüla aser ibaji magütsür Act kübok temerenshi alitsü. State aser Centre sorkartemi kechisarena nung jenjang atuba maziükteter aser mapa shitak meinyaktetba kuli sayuogo, ta APCC-isa metetdaksü. "Assam nung iba Act mapa küma metenzüktsü atema onoki public dang lungkak aittsü aser sorkar nem takhangba agütsütsü ayongzüker" ta parnokisa ashi. [6:57 pm, 06/11/2021] AMONG TYY1: Nagaon police-i state balala nung mobile auyaba telok ka apu. IC Haibergaon, SI Taranga Patowary-i anir police telok kati Jharkhand kübok Sahebganj nung Raj Kumar aser Sonu Kumar Nonia na apu. Tena ket nungi auyaba mobile phone 134 tashi ngutetogo.



Sivasagar indang Commissioner office nung Assam Chief Minister Himanta Biswa Sarma-i Sivasagar aser Charaideo district tem nung police ketdangsürtem den ajurutepa senden amenba angur. Senden nung CM Sarma-i police station ajak nungi ochimashi agientsü nenshia metetdaksü aser district ana nung law & order osang metetpela. (Sivasagar, November 6)

Guwahati nung watchman ka tepset

Guwahati, November 6, 2021 (Agencies): Guwahati kübok Maligaon nung shopping complex ka indang watchman tepseter lia angu. Iba nisungji Tarun Deka ta jangjaogo aser pa ya Darrang district kübok Mangaldai nungi liasü. Maligaon nung aliba Bipul Shopping Complex nung atalokbaji CCTV camera nung lir. Pa ya taoba ita ishika tejakdang shopping complex nung inyaksü tenzük aser iba lendong atalokba aonung pa kija dang liasü ta osang angazüker. CCTV footage nung nisung

kati watchman Tarun Deka dokan ka nung nungoktsüba aser süng agi azükba menüngoka lir. Jalukbari police station nungi metre 500 shi dang pilar iba ya atalok. Aonung 11:30 ako meta iba lendong atalok asütsü ta police-i ashir. Parnokisa iba tesem nungi süngji ngutetogo. October 26 nunga Guwahati kübok Beltola Chandanagar nung apuani tain ana tepseter lia angu. Arishi küm 86 tain Nani Gopal Barua aser pa kinungtsü Mina Barua (80) na tena mejangba takdang nung tepseta yutsür liasü.



Nagaon police-i state balala nung mobile auyaba telok ka apu. IC Haibergaon, SI Taranga Patowary-i anir police telok kati Jharkhand kübok Sahebganj nung Raj Kumar aser Sonu Kumar Nonia na apu. Tena ket nungi auyaba mobile phone 134 tashi ngutetogo.



TIR YIMYIM YIMOBILEM (EDITORIAL)

DIMAPUR AMUNGNÜ, YIMPOKSÜI (NOVEMBER) 07, 2021

Mulunglemtetba mulungjang

Asenok nisungtem rongnung dang masü saka Tsüngrem o asenok na tsüngda kati ka dak temulung lemteta alitsü kanga nungdaker. Ibaji kibur o kilir na tsüngda kati ka dak temulung lemteta aliba amai lir. Ibaji jangratemtsüka aser tepelatsüka. Aji oda, asenok mulungjang ajak agi Tsüngrem dak mulunglemteta lira, asenoki Pa menguaka Pai asenok teti repranga atar. Iba jagi asenok taküm nung nungdak ajak peridaktsür. Akhi mapang Yihuda nung Asa chubai yimsüsüba mapang, kenü Tsüngremi ainker Hanani yoka chuba dang, "shirnok mulungjang Kibuba tsütsü shitak lir, parnok atema Pa tashi sayutsü alima ajaklen Pa tenük oli aruli ta longshia repranger," ta 2 Putipuyang 16:9 nung shia aliba asenoki angur. Tetezü, kodangsa Kibubai nisung dak temulung lemtetter, Pai parnokji shingai makoktsüsa tashi aser tasü itdaktsür. Iba kasaji kodang Asa chubai Kibubai Pa dak temulung alemtsüsa ali, Kibubai pa nem pa tsükchir Ethiopia nung sepai million ka madak takok agütsü. Iba mapang, Asa chubai Kibuba dak temulung lema, "Oh Kibuba... onok yariang, kechiyong onoki nü dak temulung alemer," ta ayimtena sarasademba 2 Putipuyang 14:11 nung angur. Aji oda, Asa chubai Kibuba nungdang kechi shitak aser kechi tajung aji inyaka liasü (1 Puti 14:1), anungji Kububai pa nem Ethiopia nung madak takok agütsü aser Ethiopia nung jena ao ta kasa tapu 14:12 nung shia angur. Iba takokji Asa chuba asoshi sayatenya amai ka liasü, kechiyong nisung tsüngdangbo Ethiopia nung raraba sepaitem tashi o pa tashi naji medemangtsü mekoki liasü. Ajisüaka, iba takok tulu jagi ano Tsüngremi pa dak tali mulung lemtettsüsa ali masü saka Asai Tsüngrem dak masü nisung dakang temulung talemba lema adok. Pai pa tongpang nung takok angutsü asoshi Kibuba kidang aliba hon aser taribi agi Siria chuba mesüzüka pa nungjang teyari meshi. Tang yabo Asa chubai Tsüngremi pa meima pa mulung meyiptsü asoshi tekümdangtsü taochi o bener ainker yokaka, chubai aikerjiang pua ayu aser ainkersang pusemertem daka kanga mejungi benshi. Ethiopia nung rarar nisung million ka ket nungi kümzükang ta ayimtena sarasademba kasa chuba, kasa nisung to agi Tsüngremi ashi mangai, tang yabo pai Tsüngrem dak masü saka nisung dak temulung alem, anungji pai tamakok angu. Pai tamakok anguba tongpang yabo tamasa pai takok anguba tongpang dang nungi kanga agia tilaba liasü. Akhidang Asa chubai Ethiopia aser Israel chuba anema raraba tongpang anaji, tanü asenok taküm nunga anogo shia asenoki ajuruba alima shisabolu tebilemstü tongpangtem asütsü. Asa chubai Tsüngrem dang mashidangyongi, pai tongpang tulu ajurubaji Tsüngremi angu aser Pa dak temulung lemdaktsünüa, Tsüngremi ainker Hanani yoka Kibuba dak temulung alemtsü ajungshi saka pai manga. Ibaji mesüka, asenoki Tsüngrem dang asen tebilemstütem meshiaka Pai ngua dang lir aser Pai item atimtem shisabolu tongpang madak takok ngudaktsüner. Tsüngremibo Pa tashi asen taküm nung jungkai adoka inyaktettsüsa asenoki Pa dak temulung lemdaktsüner. Ajisüaka, aiben asenoki asen akaba rongsen aser nübo dak temulung alemer, ibayongji Tsüngremi asenok yarinüseta meyaritetter. Nisungtem rongnung shinga temeshi mali, temeshi alitsübaji tasak, anungji Tsüngremi temeshi pur masü saka Pa dak temulung lemtetba mulungjang aginür. Aji kodang, asen dak tashimait aika liaka, kodang Tsüngrem dang Asai chubai sarasademba ama, temulung lemtet tulu agi, Kibuba, ni yariang ta Pa nem dang bendanga agütsüdir, idangji Kibuba tashi agi asen taküm aser kibong nung sademsadema mapa inyaker. Asenoki asen taküm tebilemstüji Kibuba nem bendanga magütsü tashi asenok tasü maittsü aser tebilemstü nemji asenok kokdaktsütsü. Iba jagi asenoki tebilemstü tongpangji akoktsü melen tebilemstü nem asenok kokdaktsür. Nisungi pei taküm aser kibong mapayui akümba, nisung tajung ser nung peisasa mazüoktet tamajung akümba, tokolokbo techira saka tagidak maka akümba nisungtemji Tsüngrem dak temulung alemertem masü saka Asa chuba amaji nisung dak aser rongsen dak temulung alemertem asütsü. Asen taküm nung item tamakoktemji Tsüngremi ngua dang lir aser Paibo anosa takok agütsüner. Ajisüaka, Tsüngremi asenok timtem tebilemstü tongpangji angu asü mangur ta masü saka asenoki Pa dak temulung lemtetter asü masü ta asubajiang tongtibangba lir. Kibuba dak temulung lemtetbaji asenok tashi aser teyari angudak lir. Asenoki dang Pa dak temulung lemtetra, Pa tashi jagi asenok tamakoktem madak takok angutsü kodanga menua mali.

OLEMSABANG

Tasü tait tamanger tambur ana

~ A. Imdong Jamir, Dimapur

Kenü anogo Governor Pilate par Bangalow kima senzua alidang, kanga tambur ka asüktema jipa arua ashi, Nazaret nung kangki nung tasü alibaji ni agizüka remdi kü dang melang ta mepeshi aruba pa jipa ngur Pilate a temulong kanga raksaa ajip. Tensa tamajung yangi tasütait tambur, Ni kü personal secretaryba dang ozüng agüja shidi, Yihuda nung sepoy tanishir Marcus dang Yidhua sepoy, Yihuda police anir Yisu tasü mangji remang. Iba sülen Yihuda nung shisa putir ka arua leper ji kanga akanga anütsüla kechiyong pa nüsungtemi mangji aur oa shia aruogo ta alima dan sangdongtsü. Tasü tait Yusfi tongpang tulu kokogo.

Tamangtir Hezikia

Ajaki temulong lemteta aliba tamangtir Hezikia pa mapang talangka shiranga lia kenü Amos-er jabaso Isaia ainker pa semdangi arua Tsüngrem o ya ashir ta ashi, na shirang manepsü, anungji ner ki oset, ajak tiptema yang ta shir kimai mejakzük, idangjisa Hezikia Tsüngremi osang jagi aoksa. Alemli pa atura mapang Tsüngrem dena yaritepa tepok kümtepa aru, ajak bilemteta, kü tia to yamai dang na jipen ajip. Maneni jepjen ajip. Kibuba kü dang aochiang. Tsüngremi pa temulong lemtetba par temulong raksa ola adokba ajipbaji temulong shiranga bilem aser meimlaba taochi map tulu inyakogo. Israel par temenen yari merenshitsu tasüba agi merenshitsu ta ngua tamangtir Mosai oh! Kibuba yamaji nungma, Israel agi metizüksü, na teka mekanga atubaji koda tetsübuttsü ta tetsüngdai yia nüksü endoka sarasademtsü. Pa ola angashir Pa mulung melenshi. Anitet 32:14 tanüa asen Aolima, Naga lima, Hezikia ama, Mosa ama arogopur asoshi Naga yimten liner asoshi tawadadkaka maka mater shirangertem asoshi sannükertem terepranger malirtem asoshi, Ao arogo shia, town shia, yimtsüng shai nung kotaker Tsüngremi angashitsüsa, asenok tantsür tambourtemi kima yimdong nung ola agüja ranglokak purtem asoshi yimyim ayima temeim shisatsü agi sarasadema jajatsü mapang. Shir kibong shirang tenzükdir kibong ajunga lumia sarasademtsü mapangji tanü. Arishi küm 70, 80, 90 mechi, nület sür akümüli mokokminchi amer pei soyimli tamangertem ola ashiba, kangshiba asoshi sarasademtsütsü mapangji tanü lir. Shingai shinga asoshi mamshitsü.

TK 9:18 HEZEKIA shibai par taküm asen nüpurtem asoshi pei taküm wazaka yujang ta Tsüngrem den jipa jembai pa num arishi küm 15 agütsü. Pa amasa mesüaka asen limai yisu osang tajung arur küm 100 ajanger, revival arur küm 50 anasa saka tanü tashi nung Aor rongnungi Tsüngrem den nupor atema jipa jembir mali. Ajanger lolenir amatang tanü a tanü peri asünga asüng peri lanurtemji tokjang tantsür tambur, haji hakok tagidak maka, pension sen achir teimba. Temenen tanüla aoksatsüba nungi rakzükettsüsa sarasademtsür nüksü ayitoktsür mali, Ao arogo shia nungi sarasadem mongin jipa sarasadem nung Tsüngremi angashitsüsa sarasadem mali. sungo ajem dang, chi chiyong dang sarasademba yapo odang sarasademerba dang. Nenok tepang agi ni akümtsübur ta ashiba tu asenok dang ashir. Joko asen Aor tantsür tambur item yabo tamang agi temeshipur kotaker ken ten angashir ta amangtsüla kidang chirnur den semchir semnur den ata-mata nung kijen sayir o jembia anü teludaktsüma. Asenok tantsür tambour kechisarena asoshi joko ojang süang, Lot tebuttsü Sodom ajanger külen Zoar tenem nungi Sodom Komra menungra bilemba ama, joko alima ya tebilem. Sodom samatsüdang Kibuba Tsüngremi Abraham bilemtetba ama, nür chir ner semchir aser kinunger lendong nung alidang Tsüngremi Abraham bilemtetba ama asen tamang, asen nüksü asen temulong raksaba ngua kibubai asen chir aser semchir bilemtettsüsa jipa nüksü aneta sarasademtsüdi. Kima yimdong nung masü basen atepzüng asen kidang kilong nung temenen menar tebang temeli ya molumi lir Enjang zupo aneper saka O agi temulung yiruba manepteter. Tantsür tamburtem kümli sakle nemnemshishi endoktsü mepishir, asenok tensa mejungi kümogo Noa-er ronjagi atutsü, tanüla nung tzüwatsü merangangtsü mapang. Nai tali sarasademli Tsüngremi na tali atidangli ta Pa den sensaksemtepa laishibaji amer sensak semtepa anogo odaktsütsü tang mapang.

Alima nung kotaker khu tulu pongloksü dang Aron arishi küm 83, Mosa arishi küm 80 tenaprongla asenok zünger dang. Tenaprongla mokokmin mapang saka Tsüngrem jagi na tantsür na tambur tasa ta bilema mali. Nai adholi hiki tang agütsüyonga aji teperi. Otsü ka lir 1955 nung South Korea lima tenüngsang Thanks giving sentep aka, amitsür leni maor ka kechiang magütsür kechiang metenlar ta shisa bulua sarasadema alidang asangur takar kati oja ni nai yangluba sungso ji dollar 700 agi alidi, la kanga aoksa. Iba yokzükba nungi lai thanksgiving sentepi oa tenla. Tsüngremi tenlaji masü temulungjang telungji aginer.

Tantsür tamburtem

Shir molungsentsü merük merüka ali parnokji Tsüngrem angutsü yimjung yanglurtem tepelatsü kechiaser parnok dang Tsüngrem chirtem ta ajatsü. Kibuba Tsüngremi asen makamait asen bank account nung kwika lir ajak meteta lir anungji na nüpotsü nenati pension sen nungi mesüra tangar temeimeri agütsüba item nungi nenaprongla teka agi nemeta sarasademer tenlaji benangma. Kibuba Yisui kenü yamai jembai kü tenung nung kari item tila tanurtem nüm tzüzü marok ka jemdaktsülasang ni mamadoktsü. Anungji tang nungi tanü nungi Yisui ya shia lir, nenoki nangre kangang aser milen tsüklokang, saksalemang. Lk. 12:35. Mulung merükmerüka, moral takümyima (yipden merük merüka, temulungjang merükang. Yihuda 1:22, 23. Arendaka alirtem angatetdakjang kar mi nungi atsüteta kümzükang, iba ji asenok dang ashir. Tsükji aser tsüksü, san aser napong sadangba mapang. Sangremer tsük lungsoa meyiba mapang.

Pungmang kar yangi shinür.

Jan 3, 2020 aonung alima ajak mepet mokozi tanak agi oda kilong tsünpang tanak agi tongpangba ama. Iba pungmang sülen yabo tasüba wara mangyim tali aru. June 9, 2021 aonung tambur kübo temesüng pur kati "THE KING IS COMING" temerem agi zülur ya zünger ta shir agütsü. Sept. 26, 2021 aonung tambur Hezikia otsü zülüang ta tambur kati shia pungmang. Ozü kinünger 19 Oct anepdang fasting sarasadem agi. Kanga belüm nung ni ken mejang pungmang nung kibuba yisu kaket note book ka amer arua nür kinünger sarasademba onükji zülur agüjang ta shir mungoi aküm. Maneni Tsüngremi ya ashir koba arogoi mokokminer, tantsür tambur, mesenmetoi amshir iba arogo nung tanüla süngjang matangtsü. Temeim tantsür tamburtem Tsüngremi anir. Pai alima nung alur tenzükgogo, chirnur, semchisemnur num sentsü tedoktsüma. Aitai 5:7 Onok tsuraburtemi temenen mena aser joko mali. Aser onok, parnok tai temenen khu abener. TK. 109:9, 10 Par chirnur tebu mali kümjakjang, aser pa kibutsü amitsür kümjangma. Par chirtem talidak mali kümjakjagn aser azüngmeyakdak parnokji chiyongtsü bushidakjang. Anüng o ali süitemtsü saka kü o mesüitemtsü. LK 21:23. Kenü asenok ajak kotak nung ajuruteptsü osang kaket azüngertem kibubai moajangma. (Küm 85)

Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kohima nung CBCKMH-i World Sunday School Day among



November 06, 2021 nü Kohima nung Chakhesang Baptist Church Ministers' Hill (CBCMH)-i ayongzükba World Sunday School Day sentong nung Lerie School team-i Lai azüngdang tangokba noksa nung angur.

Kohima, Yimpoksüi/ November 06 (TYO): Honibarnü Kohima nung Chakhesang Baptist Church Ministers' Hill (CBCMH)-i "Worry not, fear not, have faith in God" omen nung ajemdaker World Sunday School Day mongogo.

Omen nung ajemdaker jembidang Sunday School Superintendent, Akrole Ngachui, shisabulubaji amajok nung mapang indokba dang lir, ta ashi.

Laisa, "Shisabuluba ajanga asen arrshi minute ka danga mebendenloksü. Ajisüaka ibaji

ajanga asen arrshi dang tatsüba kümdaktsüsü. Shisabulu khuret nung dang rangloker lira Yisuji shibaar asenoki mejangjatsü," ta ashi.

"Kibubai na anepalur aser nü nüngdaktem agütsüsü. Tsüngrem tsüngdang ajak senti lir. Alima nung kecha agia tamang mekoktetsü, anungji Kibuba dak dang tamang akatsüla. Asüng atema shisatebulu," ta lai tanurtem dang ashi.

Laisa tanurtem dang Tsüngrem meimbaji nü melungjang nungi adoktsüla, ta

ashi. Shisabulu koktetsü atema nai nü sorobangru atema shisamebulutsüla, nü shisabulu lemsatepang aser tangar dang nungi shisa agiang, ta lai ashi.

Iba anogomong nung tesayur aser tanur 400 shi aden. Kasa sentong nungsa tanurtemi ken aten, lai aziung aser shilem balala agia liasü.

Sunday school tesayur, Thsope Medo leniba nung sentong agi aser Lütsölü Hestüh, Wephrü-ü Medo den Lerie Sunday School team-ia shilem balala agia liasü.

Eritrea nung Khristan putirtem anema inyaker aser tepseter

November 06, 2021: Eritrea linük nung sepaitemi Khristan putirtem anema inyaker aser tepseter, ta November 3 nü Release International-i sangdong ka ajanga metetdaksü.

Release International ministry-i taoba mapang tepuokdak alila, Helen Berhane interview agia liasü. La Khristan asubayong Eritrea nung sorkar ketdangsertemi la tepuokdak kum ana ayuba mapang nung kanga reshikangshia liasü.

Helan Berhane-i, "Eritrea sepaitemi putir aika tepsetdar aser parnok kinüngtsürtem tashiyim amshia raksatsür," ta

metetdaksü. "Putir kari Kangki mechioker, ibayongji parnok teka alangdoktsür. Sepaitemi putirtem dang parnok korang agizükang, ta tuyuba mapang putirtemi yamaji meinyakra khaseter. Eritrea sepaitem ket nung putir noklang aika südar," ta lai ashi.

Africa nung North Korea linük, ta ajaba Eritrea linük nung party kati yimsüsüba sorkar lir aser sorkari tamangba yimsü kanga anemer.

Linük nung tamangba yimsü dak sendakba nung pua tepuokdak ayurtem kanga reshikangshir aser tepseter.

Release International-i November 7 nü 'International Day of Prayer for the Persecuted Church' anogomong nung Eritrea nung Khristantem atema-a sarasademjang, ta mepishia metetdaksüogo.

International Day of Prayer anogomong nung Khristantemi North Korea, Afghanistan, Nigeria aser China densema Khristantem reshikangshiba linüktem nung Khristantem atema sarasademtsü.

Iba anogomong nung shilem aginertemi Pray for the Persecuted app download asütsü akok aser sarasadem onüktem agizüksü akok.

Chhattisgarh nung Hindu nungertemi pastor ana dak azük

November 06, 2021: November 2, 2021 nü India kübok Chhattisgarh state nung Hindu nungertemi pastor ana dak azük aser Khristantem tepsettsü ta amokmerena liasü, ta International Christian Concern (ICC)-i metetdaksü.

Osang angazükba agi, Khristantem tekülem sentong tagidak mapang nung Hindu yimsü alia amanger telok ka arua timtem agütsü, pastor ana dak azük, Laishibatem rongdoktsü aser yimdam Khristantemi tekülem sentong

magitsüla, ta amokmerena liasü. Nikongdang 4:00 ako meta Dhamteri District kübok Biler yimdam Rajnikanth Devaghan aser Nilambari Sahu na leniba nung telok ka arua Khristantem tekülem sentong tagidak mapang nung timtem agütsü, iba sülen parnoki Pastor Sasharath Maanikpuri aser Pastor Kesar Manikpuri na kimai atsüzüker azük.

Iba sülen lokti jagi Laishiba den ken kakettem bendenba sülen lenmang nung rongdok. Hindu nungertemi jagi

Khristantem dang Hindu yimsü dangi tanaben meyipang, ta ashiba den külemi nenoki maneni tekülem sentong agira tepsettsü, ta amokmeren.

Khristantem Laishiba aser Khristan kakettem azüngtsü memelar, ta parnokisa ashi.

India nung Khristantem tekülem sentong tagidak mapang nung timtem agütsüba kanga bulua kümdar aser Chhattisgarh nunga Hindu yimsü alia amangertemi lokti senden ayonga Khristantem anema jembiba kanga bulua kümdar.

ANOGO ABEN TSÜNGREM DEN

TSÜNGREMJI ATANGJI

Yisui pa dang ashi, leman atangji aser taküm ni lir... .. Yohan 14:6

Atangji ta kodang südir ochi (truth) dang ajar. Ochi tamendakdakji Tsüngrem lir, aser aji Pa dak mezüng nungi keta aliba jakla koba melenshitsü makok. Aji asünung Pa dak tiyazüji khenyongi yangsema mali; Tsüngrem rangbenji ochi lir. Saka Satanbo "tiyazü tebu" (Yohan 8:44) ta ajar. Pa mapa ajak agi külakoktsüsü, tauyatsü, tepsettsü, aser raksatsüsü (Yohan 10:10) aji Pa mapa. Iba wadang ana kota balala.

Meimchir mulungjang nung ochi aser tiyazü teti tatsütepba alir, aser shir Kibuba nung teti alir parnoki ochijisa pukümer. Ibaji pa/la taküm nung takok tulu rongnung tuluba lir. Kechiaser kodang ochiji melilir teti nisung mulung nung taitüsübä bener alir aser aji agi pa/la kangtener aser nüchi jenjang mengteter.

Anungji, ochi aser atangji bushitsü Laishibai ashir. Apijemtsü Shin 23:23 nung "ochiba aliang aser aji teyok" ta ashir, kechiyong aji jenjang tulu lir. Ano Efesa 6:14 nung ochi agi nangri akangtsü ashir, kechiyong tanela tongpang nung ochiji hadir tajung lir. Ni kodang ochi pukümdir na kodanga malangtsü, kechiyong ochi jagi asenok nüchi kümdaktsüsü (Yohan 8:32). Nai anogoshia ochi lenmang bushiang aser yangji teti jajang.

SARASADEM

Temeim Kibuba, tanü nai ni jara ni ochi nung lia nai ni ngudima? Ni ochi lenmang nung jajatsü ni nangzüker. Amen.

China linük nung Khristan 600 shi apu



China nunger Court ka nung CAG züngsem ka anema ken o angadanga mapang tangokba noksa nung angur.

November 06, 2021: China rongnung arrshi küm 80 tantsür nung communist sorkari kata küm ana ser ita pezü Khristantem anema inyakra tepuokdak ayutsü obendang mapang sorkar ketdangsertemi agütsü.

Church of Almighty God (CAG) Shandong Province kübok züngsema aika puogo. tesem balala nunga CAG aser parnok ajak ita 6 nungi küm züngsem 237 puogo.

7 tashi tepuokdak ayutsü obendang agütsüogo, ta Bitter Winter report ajanga metetdaksü. Taküm January 28 nüa Henan province kübok Tongxu county nung aliba court kati CAG züngsem pongu anema ken o angadanga sülen parnok rongnung ka küm tenet aser ka küm tenet ser tesadang tepuokdak ayutsü obendang agütsüba den külemi tenaprongla dang senchi yuan sen 10,000 achi.

Chinese Communist Party-i kum asem tsüngda Khristantem anema inyaksü aser Arogo samatsüsü nükjidong nung maparen tenzükogo, koba dang "Final Solution" ta ajar.

Tang tesüsa Jinan yimti nung People's Court of Zhangqiu-i CAG züngsem 48 apu aser parnok küm ana nungi asem tashi tepuokdak ayutsü obendang agütsü. Taküm January nungi March ita tsüngda Jiangsu, Henan aser Sichuan province tem nung CAG züngsem 750 apuba sülen asüngdangya aser reshikangshia liasü.

Tang pua alirtemji arrshi küm 2020 küm China 20 tekübokpurtem aser arrshi küm 67 temapurtem lir. Parnok 5,587 tashi reshikangshio.

OLONG PAITEP # 5989

15x15 crossword grid with numbers 1-15 indicating starting positions for clues.

TIPILEN and LANGTSÜNGLEN clues for OLONG PAITEP # 5989.

OLONG PAITEP # 5988 TELANGZÜBA

TIPILEN and LANGTSÜNGLEN clues for OLONG PAITEP # 5988.

NOVEMBER ITA NUNG ALOKBA TETI SHIRANGER: Alokba, Sentsüla, Alokba, Sentsüla, Alokba. Includes Lilir: WhatsApp.

TANÜBO NAI LANGZÜANG

Q. 'AY.4.2' ya ____ ka lir. [A] AI Chatbot [B] Coronavirus lineage [C] Space vehicle [D] Exo-planet. YASHI ADOK TELANGZÜBA: Bibek Debroy

AO OSHI ANGAZÜKDAK:

TANÜ ANGAZÜKTSÜBA OJANG



Lenla (n) mapang shitak matong, tom nung (premature) * Chiyong memeshidang lenla nung onok süngo khen ajem. Lenlak (n) Lenmang tatebänglen (last portion of the path) * Lenlak nungi telok kati lenmang piyonga adok.

Happy Birthday

TENÜNG : ALINA JAMIR Tasoba küm : 07-11-2019 Küm : 2 years Talidak : Taxes colony; Lengrijan Dimapur : ; Nagaland Temeimtila Alina, Na küm 2 ajungba temeim salem abener. Tsüngremi na manemi pa taochi temeim nung len niangni. Asen teyanglur Tsüngremi ano jala anema aliba den arishi anogo temjena moajang ta sarasademtsür. -Temeim Tsurabur, Otsü, Obu, & kinungertem



NAI-A YA METETTER MA

Rubik's Cube rongnung 'Masterpiece Cube Rubik's cube tasaktiba asütsü aser iba Rubik's Cube jenjang \$2.5 million lir. Tanga Rubik's cube ama 'Masterpiece Cube Rubik's cube' amshitetter aser iba cube nung emerald, amethyst aser ruby tem inoka yanglutsü. Diamond cutter takotet, Fred Cueller-i 18 karat gold amshia iba Masterpiece Cube yanglua liasü aser cube shia nung sentsü balala indang sticker maloktsü melen, pai 34 carat ruby, 34 carat emerald aser 22.5 carat amethyst tem inoka yangluogo.



SUDOKU # 6030

Sudoku grid for puzzle # 6030.

TELANGZÜBA # 6029

TELANGZÜBA grid for puzzle # 6029.

OJANG LUTEP # 5576

NGTAAR : [] [] [] [] [] [] AIT : [] [] TÜAPSU : [] [] [] [] [] NGDA : [] [] [] [] ERANMEMGI : [] [] [] [] [] [] [] EPI : [] [] JIBEMBA : [] [] [] [] [] ERAS : [] [] [] [] MAKBINYATE : [] [] [] [] [] [] [] ITSASANGADSHÜLA : [] [] [] [] [] [] [] [] [] [] [] [] [] [] []

OJANG LUTEP TELANGZÜBA # 5575

TAMANGER AMA TSÜNGREM SENTONG ANGATETA PAI AGINÜBA INYAKTSÜJI KANGA TONGTIBANG

TAN HOPTA ATEMA - KOMA SÜLA ?

Q. Akhidang ama, ABAM kübok lanurtem ya küm shia lanur mungdang (Youth Convention) ya Impur nung dang melii, tagizüker dang lira, yimtsüng aser town arogotem nung among nunga koma süla ?

Maharashtra nung hospital mi lendong nung nisung 11 rongset



November 06, 2021 nü Maharashtra state kübok Ahmadnagar nung aliba sorkar hospital COVID-19 ward nung mi lendong atalokba sülen nisungtem adenshia reprangba noksa nung angur. Iba lendong nung nisung 11 asü.

Ahmednagar, November 06 (Agencies): Honibarnü Maharashtra kübok Ahmadnagar District Hospital nung mi lendong nung shiranger 11 rongset aser kasa hospital nung aliba Intensive Care Unit (ICU) nung shiranger trok mi agi mejungi arong.

Anepdang züngia ICU densema hospital shilem kar arong, ta Ahmednagar district collector Rajendra Bhosale-i metetdaksü.

Iba lendong nung asürtem aser yirur ajakji coronavirus agi shirangertem liasü; asürtemji tebur trok aser tetsür pezü lir, aser parnok ajak arrshi küm 50 nungi 85 tsüngdapurtem liasü, ta district collector-isa metetdaksü.

ICU nungji shiranger 20 temongdak liasü, aser iba ICU nungjibo coronavirus agi

shirangertem dang yaria liasü. Hospital building ya küm ana tejaklen ang yanglu anungji electrical wiring sür mapang talangka masü.

State Chief minister, Uddhav Thackeray-i iba tatalokba bushisüngdangtsü tuyuogo aser district minister-in-charge, Hasan Musharif dang report agüjang ta tuyuogo.

Maharashtra Health Minister Rajesh Tope-i asür kinüngertem den mangyim jashi lemsatepba den külemi asürtem kibong shia nem sen lakh pongungu teyari agütsütsü, ta sangdong.

Maharashtra cabinet minister aser NCP lenir, Nawab Malik-i, aibelenertem nem temerenshi agütsütsü, ta metetdaksü aser chief minister Uddhav Thackeray-i asürtem aser yirua alirtem nem senotsü

teyari agütsütsü, ta metetdaksü.

Malik-i, "Ahmadnagar sorkar hospital indang ICU unit nung mi lendong atalok aser iba lendong nung nisung 11 asü aser ka mejungi yiru. Hospital indang 'fire audit' agir asü magari onoki metetpelatsü. Aibelenertem nem temerenshi agütsütsü. CM-i asürtem kinüngertem nem senotsü teyari agütsütsü," ta metetdaksü.

Iba osang angashia Union home minister, Amit Shah-i twitter ajanga, "Civil Hospital, Ahmednagar, Maharashtra nung lendong atalokba osang angashia jashir. Iba ama mangyim mapang nung ni mangyimertem den tejashi lemsateper aser yirua alirtem tekeraba nung anepjang ta sarasademsür," ta lemsatep.

Sangküm May ita tashi angati ration agütsütsü: Arvind Kejriwal

New Delhi, November 06 (Agencies): Honibarnü AAP tongti lenir aser Delhi Chief Minister, Arvind Kejriwal-i, Aam Admi Party (AAP) sorkari angati ration agütsüba scheme ano ita trok atsülanga sangküm May ita tashi agütsütsü, ta metetdaksü.

"Osettsüset/aonsotsü nung jenjang kanga tuogo, ibayongji sensakertembo anogo ka nung anaben chiyungtsü atema timtemer. Coronavirus wara ajanga nisung aika mapa makai kümogo. Ato kilonser,

yimlibilema sensakertem nem angati jang agütsüba scheme ita trok danga atsülangang. Delhi sorkaribo angati ration agütsütsü atema ita trok atsülangang," ta pai Hindi oshi nung twitter ajanga metetdaksü.

Anogo ka tejaklen Food Secretary, Sudhanshu Pandey-i, Centre sorkari November 30 sülen nungjibo Pradhan Mantri Garib Kalyan Anna Yojana (PMGKAY) scheme agütsütsü tebilemba mali, ta metetdakja liasü.

Delhi nung AAP sorkari

National Food Security Act (NFSA), 2013 aser PMGKAY kübok beneficiaries nem angati ration agütsür.

Delhi nung fair price shops 200 dak tema lir, ration card holders lakh 17 shi lir aser beneficiaries ajak senteper lakh 78 jungnüa lir. Angati ration ji subsidised jenjang nung agütsür.

Coronavirus wara mapang sensakertem yaritsü atema yaküm March ita nung Centre sorkari PMGKAY scheme ya tenzüka liasü.

Yaküm petrol/diesel jenjang atuba ajak ajemtsüla: Congress

New Delhi, November 06 (Agencies): Honibarnü Congress Party-i, tesüiba küm ka tsüngda petrol aser diesel jenjang atuba ajak ajemtsüla, ta akhangba den külemi sangküm March ita tashi angati rations agütsüba scheme manentsüla, ta takhangba agütsü.

Congress party otongdar, Pawan Khera-i, coronavirus wara tenüng amer Centre sorkari petrol litre nung sen 13 aser diesel litre nung sen 16 tuogo, anungji yaküm jenjang atuba ajakji ajemtsüla, kechiyong Centre sorkari GST saru nung sen peria sarutetogo, ta metetdaksü.

"Covid wara matongdang GST aika sarutetba atema sorkari tenüng sanga jembir. Petrol aser diesel jenjang atutsü atema nenoki (Centre) Covid tenüng am. Yimlibilema jenjang ajemang, kechiyong coronavirus wara tembangogo aser GST saru junga sarutetdar," ta pai ashi.

"Onokisa sensakertem nem angati jang lema agütsüba Garib Kalyan Yojna November ita nung manentsü atema akhanger. Iba schema ya sangküm March ita tashi agütsütsüla, kechiyong alima nung 'hunger index' nung India jenjang mejungi aliba asenoki metetogo," ta Khera-i ashi.

Global Hunger Index 2021 nung India jenjang 101buba nung lir, yakümbo iba index nung India jenjang 94buba nung

ang liasü. Congress-i yimsüsüba state tem nung petrol aser diesel nung VAT saru ajemtsü dak sendakba nung tasüngdangba ka langzudang pai, iba atemaji o lemtepdar aser kobo melii telemtetba ka agütsü, ta metetdaksü.

Iba dak sendakba nungsa pai, BJP aser teloktep sorkar 27 nung lir, saka Congress sorkarbo state asem nung dang lir; totzü jenjang tali atuba ya Central excise saru ajanga lir, ta ashi.

"Congress-i yimsüsüba state temi iba atemaji (saru ajemtsü) jembidar aser kobi melii telemtetba agütsü," ta pai metetdaksü.

Taoba Bodhbarnü Centre sorkari petrol aser diesel totzü nung saru ajemba sülen anogo ka dang lir Brihostibarnü BJP-ia parnoki yimsüsüba state 9 nunga petrol aser diesel jenjang ajemtsü, ta sangdonga liasü. BJP-i yimsüsüba state temji Assam, Tripura, Manipur, Karnataka, Goa, Uttar Pradesh, Gujarat, Himachal Pradesh aser Uttarakhand state tem lir.

Centre sorkari petrol litre shia nung saru sen 5 aser diesel litre shia nung saru sen 10 ajemtsü, ta sangdonga liasü, iba sülen Assam, Tripura, Manipur, Karnataka aser Goa densema state kari petrol aser diesel naprongla litre shia nung sen 7 ajemogo.



November 06, 2021 nü AIIMS Jodhpur nung aliba ICU nung pei sasa Tsüngrem nisung ta ajasang, Asaram Bapu anir oa yaridar. Temesen aser urine infection timtem adokba den külemi anogo pongu tashi temang metaba sülen pa hospital-i anir ao.

BJP aser RSS-i nüburttem telongjem raksatsüner: Rakesh Tikait

Ghaziipur, November 06 (Agencies): Honibarnü Bharatiya Kisan Union (BKU) otongdar, Rakesh Tikait-i, Bharatiya Janata Party (BJP) aser Rashtriya Swyamsevak Sangh (RSS) nati linük nung nüburttem telongjem raksatsüner, anungji nüburttemi kümdanga alitsüla, ta ashi.

"BJP aser RSS nisungtemji parnoki sayuba ama masü. Nisungtemi parnok dang nungi kümdanga alitsüla. Parnok aolen ajak nung parnoki telongjem raksatsür aser nüburttem raksatsür," ta pai osangbenertem nem metetdaksü.

Aluyimertemi yaküm Centre sorkari benokba aluyimba ozüng tasen asem

anema longkak aitba sülen küm ka ajungba nungtem nung kechi inyaksü, ta asüngdangba langzudang Tikait-i, "Sorkari ken o jembinüra junger, ajioda mesüra onoki maneni longkak aittsü," ta metetdaksü.

"Maneni longkak aittsü atema onoki achaayangtsü. Asükwa mongpu aruogo, anungji onoki aluyimertem dang chiyungtsü aser süoshi tali bener arutsü metetdaksütsü," ta pai ashi.

"Joko küm ka jungogo, saka kechiba sorkari onok den mejembir. Yamai mapang talangka longkak aitba nenoki meteter ma? Sorkari kechi inyakkdaksüner, onok den ken o jembitsüla, onok renema dang lir," ta pai ashi.



November 06, 2021 nü North Kashmir kübok Barramulla District nung aliba ski resort nung raliwalirtem rürjep agi asayaba noksa nung angur.



Hokolbarnü Houston nung Astroworld music festival lapokba aonung mepetmesü adoka nisung ti asü aser aika yiruogo, ta ketdangsürtemi metetdaksü. Houston Fire Chief Samuel Peña-i tanep osangbenertem den sensaksemba mapang nisung asüba osang jangjatsüogo. Iba lendong ya 9:00 ako nungi 9:15 tsungda atalok. Lokti stage anasa nongtepba mapang iba lendong ataloka liasü.

China-i tenokdangba agütsüba ajanga Taiwan mepelar

Beijing, Yimpoksüi/ November 6 (Agencies): Taiwan nüjiso pusemertem ajak taküm tepeyong temzüng ozüing raksar ama züngshitsü ta China-i Hokolbarnü ashiba sülen Taiwan nungertem mepelar.

Tang mezüngbuba China-i, Taiwan nüjiso pusemertem atema temerenshi sangdongogo, aser merenshitsu purtem rongnung Taiwan ketdangsür tongtitem densema lir. Linük ana tsungda mangatetep adoker aliba mapang tang iba ajanga ano tensa tamajungba kümogo.

China-i iba asetkong ya parnok meyong aser nüngdak dang sera tashiyim agi atsüngsü ta shia arudar aser kasa mapang nung Taiwan-ia parnok ya nüjiso ngur aliba linük ka aser nüjiso aser democracy atema nokdaksü ta shia arudar.

Taiwan Affairs Office-i, Taiwan Premier Su Tseng-chang, Parliament Speaker You Si-kun aser Foreign Minister

Joseph Wu nunger ya Taiwan nüjiso atema nokdakertem ta shiogo. China-i tang mezüngbuba iba list nung alirtem tenüng yimjak nung sangdongogo.

China-i iba list nung alirtem mainland aser China indang Special Administrative Regions; Hong Kong aser Macau-i maitdaksütsü, ta otongdar Zhu Fenglian-i Hokolbarnü ashi.

Item nisungtem ya mainland nung aliba nüburtem aser lokti tentet balala mesera company balala den tesendaktep meyudaksütsü mesera parnok nem senotsü teyari agütsüba lokti tentetem mainland nungi ajangzüksü memelatsü, ta lai ashi.

Taiwan indang Mainland Affairs Council-i, China inyakyim aija, Taiwan ya democratic lokti tentet ka aser Beijing-i masü saka rule of law-i yimsü asür ta ashi.

"Onoki tashiyim amshirtemi

amokmerenba magizüker. Nüburtem kümzüka ayutsü atema jenjang tapet agitsü," ta council-i ashi.

Maneni Zhu-i ashiba agi, "shirnoki tsü tebou tem amatoker, tetsü tasoli ashioktsür aser linük lemdangtsür parnok tajung nung metembangtsü aser parnok nüburtemi magizüksü aser puti otsüi obendangtsü."

Kasa mapang nung Taiwan indang foreing minister, Joseph Wu-i Honibarnü Twitter ajanga, "CCP-i ni taküm tepeyong atema list nung züngoksemba aser kü nem tenokdangba agütsüba sülen kü nem tenüngsang agütsüba osang aika agizükogo," ta ashi.

"Nisung aika parnokbo mezüngoksemba atema tenük meremer aser karibo kong apply asütsü ta asüngdangogo. Ni maneni Taiwan nüjiso aser democracy atema raratsü," ta pai ashi.

Punjab cabinet-i TLP nem tenokdangba agütsür aliba agintsü agizük

Islamabad, Yimpoksüi/ November 6 (Agencies): Pakistan nung Punjab cabinet-i Tehreek-e-Labbaik Pakistan (TLP) nem tenokdangba agütsür aliba agintsü atema benokba agizükogo, ta local media sangdong balala ajanga metetdaksü.

"Home department-i ken o benokba sülen Punjab cabinet-i Tehreek-e-Labbaik Pakistan (TLP) nem tenokdangba agütsür aliba agintsü atema Punjab cabinet-i agizükogo," ta ARY News sangdong ka ajanga metetdaksü.

Federal interior ministry nem temepeshiba ka agütsütsü atema iba ken o ya Punjab Chief Minister Usman Buzdar dangi yokogo. CM-i temelaba

agütsüba sülen home department-i tenokdangba agütsür aliba agintsü atema interior ministry dangi shiti ka yoktsü, ta Pakistan media-i metetdaksü.

Brehostibarnü, ken o bentettsü atema sorkari-i tentettsüba committee aser tenokdangba agütsür aliba telok na tsungda bangjemer aliba maneni tejakdangi bener oa Punjab home department-i, TLP nem tenokdangba agütsür aliba agintsü atema chief minister dangi aben.

Punjab home department-i TLP nem tenokdangba agütsür aliba agintsü atema jenjang agi tenzükogo, ta ARY News sangdong ka ajanga metetdaksü. Kasa sangdong

ajanga, department-i Punjab Chief Minister dangi iba ken o benogo, ta ashi.

Chief Minister dangi abenba ken o nung provincial home department-i, Buzdar dang TLP nem tenokdangba agütsür aliba agintsü benok. Source balala ajanga ashiba agi, temzüng ozüing dak sendakba nung sub-committee-i iba ken o ya agizüka liasü.

Punjab CM aser cabinet-i Ken o agizükba sülen, iba ken o ya federal sorkar dangi abentsü.

Tenokdangba agütsür aliba telok; TLP aser Imran Khan-i aniba sorkar na tsungda mangatetep adoka aruru Deobarnü tenangzüktepba ka agiba sülen hopta ishika lir iba jenjang agiogo.



Activists tem tepsetba osang prokshiba sülen Mazar-i-Sharif yimti nung tetsür pezü sür lia ngutetba osang Afghanistan, Taliban sorkar otongdar-i Honibarnü metetdaksü. Yimti kübok police district pongububa nung tasü mang pezü ngutetba sülen iba dak sendakba nung temulung melema bilemer ana puogo, ta interior ministry otongdar Qari Saeed Khosti-i ashi.

New Zealand nung tang mezüngbuba nisung 200 dak corona putet

Auckland, Yimpoksüi/ November 6 (Agenceis): New Zealand nung Honibarnü nisung 206 dak Covid-19 tashidak potetogo, koba coronavirus wara pokteter tang mezüngbuba anogo ka nung nisung 200 tema dak tashidak potetba asütsü. Nütsüng yongsük million 5 aliba linük nung vaccine agütsütsü atema aritepba mapang tashidak tali prokshia odar.

Nütsüngyongsük timba aliba yimti Auckland nung nisung 200 dak tashidak poteta liasü. Iba yimti ya ita asem shi tenokdangba balala kübok lir, kechiyong iba yimti tang Delta variant den raraba mapang ka lir. Ajisüaka tenokdangba ya Hombarnü nungibo agintsütsü imlar.

Ato Kilonser Jacinda Ardern-i, lai Auckland nung alirtem southern hemisphere summer aser Christmas atema senzüsenpongdaksüner, ta ashi.

"Onoki Auckland nung alirtem iba mapang Auckland nung dang sabanger mayutsü," ta Ardern-i osangbenertem den

sensaksemba mapang ashi. Honibarnü nisung aika dak tashidak potetba ajanga vaccine agitsü koda tongtibang iba indang nenshir, ta health ministry-i ashi.

Ministry-isa, New Zealand nunger arishi küm 12 temapur shilem 78 nem vaccine dose anaprongla agütsüogo aser shilem 89 nem Hokolbarnü tashi nung mezüngbuba dose agütsüogo, ta ashi.

Covid-19 wara kanga junga aziüoktetba atema alima ajungai tenüng sanga aruogo, ajisüaka New Zealand-i Auckland nung Delta variant poktetba menokdangtet, aser iba ajanga tashidak meshi meshia samatsütsü Ardern sentong aliba melenshir tashidak den külemi alitsü atema inyaksangshi tenzükogo.

Ajisüaka linük aika dang nungi New Zealand nung iba tashidak tajungba aziüoktetogo. Tang tashi nung nisung 7000 majung dak dang tashidak poteter lir aser tashidak agi nisung 31 dang asü.

Sierra Leone nung fuel tanker ka apokba sülen nisung 91 asü



Sierra Leone yimtiba Freetown nung totzü abenba gari lendong ataloker sülen tangokba noksa nung angur.

Freetown, Yimpoksüi/ November 6 (Agencies): Hokolbarnü Sierra Leone yimtiba Freetown nung totzü abenba gari ka tsükteper apokba sülen nisung 91 süogo, ta central morgue aser local ketdangsür kati ashi.

Iba lendong nung nisung asüba indang osang sorkari tang tashi agüja mali, ajisüaka Freetown nung central state morgue manager-i ashiba agi, totzü abenba gari apokba sülen parnok dangi tasü mang 91 bener aruogo.

Iba lendong nung asürtem rongnung totzü abenba gari nungi totzü yangzüka aliba tateni arurtem densema lir, ta Freetown indang mayor Yvonne Aki-Sawyerr-i Facebook sangdong ka ajanga metetdaksü. Totzü abenba gari ya apokba sülen iba anasa aliba nisung aika rongset.

"Mi agi rongsar aliba tasü mang aser iba lendong nung tasür aika lir. Iba ya kanga dang lendong tamajung ka," ta National Disaster Management Agency tekolakba Brima Bureh

Sesay-i lendong ataloker aliba tesem nungi video ka ajanga lemsatetep.

Online nung noksa balala prokshiba nung mi agi kanga mejungi ronger aliba nisungtem lendi nung mepidaka aliba sayuogo. Iba mi ajanga anasa aliba dokan aser nisung aliba kitem rongka liasü.

Aki-Sawyerr-isa, video aser noksatem ya kanga tetsübuttsüka, ta shiogo.

Mayor-i, iba lendong nung takoksa ajuruba ajakbo mejanja ta ashiba den police aser la indang deputy, disaster management ketdangsürtem nem teyari agütsütsü atema lendong ataloker aliba tesemi oa lir, ta ashi.

"Iba lendong nung asür kinungertem den asükhü lemsateper aser lendong nung shirnoksa yiruogo, nenok ajak takaratiba nung taneptsü angutsü imlaja atar," ta tir Julius Maada Bio-i tweet asü.

"Ozü sorkari iba lendong agi kongshi aliba kibongtem nem takokba tashi teyari agütsütsü," ta paisa ashi.

NDPP Phek Region lokti senden menogo



Kohima, Yimpoksüi/ November 06, 2021 (TYO): Hokolbarnü, Phek district kübok Kapamodzu Peak, Zhavame village nung Nationalist Democratic Progressive Party (NDPP) Phek Region lokti senden agia liasü, ta sangdong ajanga metetdaksü.

Iba senden nung, Nagaland Minister for Planning and Coordination, Land Revenue and Parliamentary Affairs Neiba Kronu, NDPP Central working president i/c Phek region Nuzota Swuro aser NDPP vice president K Puro nung aruagi denogo; aser NDPP Phek region president Mosonyi Domeh menden liasü.

Iba senden shilem ama, NDPP Phek region-i onük pungo agizüktsü asoshi bangjemtep, koba Convenor Resolution Committee Neikhrolo Khalo aser Member Secretary Dr. K. Hoshi ajanga telok dang metetdaksa liasü.

Nagaland Chief Minister, Neiphiu Rio-i lennir ka ama Sorkar tenzükba wadang nung bendanga agüja inyakba; party maparen nung

NDPP president Chingwang Konyak-i takok ngua inyakba aser district nung party atema Minister Neiba Kronu-i kanga dang mulungsoa aser bendanga agüja inyakba atema, NDPP Phek region-i lennirtem dang kangasa pelaba metetdaksü.

NDPP Phek region-i item lennir dak tamang akatsü asoshi bangjemtep aser tarutsü nunga parnok den maneni amalitepa inyaksü aser nungitta yaritsü asoshi nangzükogo.

Naga yimtenren onük tebilemtsütem ataloktsütsü nuklayur, United Democratic Alliance (UDA) government akhüm kübok opposition-less government tentettsü asoshi Chief Minister ajanga inyakba maparen NDPP Phek region-i pelashishia agizükogo.

Naga nungeri yongya ataba ama, India Sorkar aser Nagaland nung telok (negotiating group) balala tsüngda tangatetep kati arutsü aser nüburu agizüktsüsa yakta telemtetba tajung ka agitsü asoshi, UDA sorkari iba maparen nung nungitta yaritsü ta NDPP

Phek region teimla lir.

Taruba State general election agitsü ita 15 dang lia, tanga political party nungi züngsem aika NDPP nung dendar aser ibaji ajanga party tali akangshidaksür; aser iba dak sendakba nung, NDPP Phek region-i iba party nung adentsü mulunga alir ajak pelashishia agizüktsü asoshi bangjemtep, ajiastünungang 2023 general election sülen, NDPP-i aniba sorkari tanaben yimsü asütsü asoshi ajak longjemer inyaksü.

2023 state general election atonger asünung, region/district nung NDPP ticket agütsütsü atema, tamasa party nung inyaker shia ola angadangtsü asoshi NDPP Phel region bangjemtep.

Maneni, kasa senden nung, tang Phek district kübok teinyakdak aliba two-lane lenmang maparen atema, iba project temer sülen, lenmang tezülen süngjang atangba süngdongtem atemtsü asoshi NDPP Phek region bangjemtepogo, ta sangdong nung shia lir.

MOLUNGNEN LEMSATEPER

Asoba : 08-10-1914



Asüba : 02-11-2021

Onoki teti akümtsübuwa aliba tsürabur Asür **IMPANGCHIBA IMSONG** (Unger) pa taso nü nungi akümlü wadang tempangba tashi nung kwikati ozü dang temeim sayua nungita yariogo, nenok ajak dang kinungertemi kanga pelaba lemsateper.

Onoki nenok mapa tajung kodanga mamatsü, Teyanglur Tulusang Tsüngremi molamushia moajangma ta ozü tamang sarasadem.

- Temeim Chirnur, Semchir, Anükapang & Kinungertem.

State nung ninang metsütsü lenmang sadema lapoka lir: Mhathung



Advisor, Horticulture & Border Affairs, Mhathung Yanthan-i awareness sentong nung jempiba noksa nung angur.

Wokha, Yimpoksüi/ November 06, 2021 (TYO): Hokolbarnü (05.11.2021) Wokha District kübok Sanis town nung Central Institute Horticulture (CIH) Midziphema, Ministry of Agriculture & Farmers Welfare den longjemer Nagaland Beekeeping & Honey Mission (NBHM) ajanga "Scope & Importance of Bee, Beekeeping & Honey" nung awareness sentong ka ayonga agiogo, ta sangdong ajanga metetdaksü.

Aluyimer dang 'bee pollinating services' ajanga alu nung tsünüsembongtsü timba züsentettsü aser sen arutsü lenmang yanglutsü ajungmesotsü nukjidong nung iba sentong agia liasü. Iba den külemi, ninang mojitzü tajungtiba yanglutsü aser shishilembadak item mojitzü yoktetsüsa asalentongtem atongtetsü nukjidong yur inyaker.

Iba sentong nung, Advisor, Horticulture & Border Affairs, Mhathung Yanthan-i, 2007 küm Nagaland Beekeeping & Honey Mission (NBHM) amenoker külen nungi iba iba Mission ajanga maparen achaayanga arudar, ta ashi; aser State Sorkar tebilemba atalokdaksütsü atema (NBHM)-i meranga inyaka takok tajung aika ajangzükteba atema pai pelaba lemsateper aser tarutsü nung iba wadang takok angutsü asoshi maneni meranga inyaksü pai ajungshia liasü.

Ninang metsüba dak alia, NBHM-i maparen tasen talisa leptsü kioktsü (broom) aser konger lu ayimba bendenloka inyakba atema Mhathung-i pelaba metetdaksü.

Iba tesem (Sanis) nung nübur aikati ninang bulua memetsür asünung, tanü iba maparen

indang metetpeladaksür ta ashi aser NHBM, team lennir ka ama jembiba mapang, pai iba tesem nung alir nübur dang ninang metsütsü asoshi ajungshia liasü, kong aikati memulung/maparen pelashishia magizük, saka teloki ninang metsüba indang tajangzük aser tongtibang tem angatetba atema pai pelaba lemsateper.

Mhathung-i, State nung aluyimer ajangzüktsü atema ninang metsüba ya kanga tongtibang, ta ashi. Nagaland ama State ka, koba yimtsüng tem nungang timba alu ayimer, item yimtsüng nung ninang metsütsü asoshi lenmang sadema lapoka lir aser iba maparen kümzüka ayutsü aser benshitsü atema pai training agirtem ajungshia liasü.

Iba ama awareness sentong ayongzükba atema pai Nodal Department dang pelaba metetdaksü aser tanü training nung angzükbatem tangar den lemsateptsü asoshi pai shilem agirtem ajungshio.

Commissioner & Secretary to Governor of Nagaland and Team Leader NHBM, T. Mhabemo Yanthan-i, okila jembiba mapang, yimtsüng nung alirtem rongsenketzung inyakyim nung nungittsü kanga tongtibang aser ninang metsüba ajanga yimtsüng nung alirtem rongsenketzung nung nungittsü asoshi lenmang lir, ta ashi.

Van Dhan Vikas Kendra (VDVK) kübok ministry of tribal affairs akhüm nung iba department (NBHM) ajanga ninang metsüba aser konger lu ayimba nung National Award agizükogo, ta pai shisem.


Iba training sentong nung Sanis division kübok yimtsüng 15 nungi ninang metsür aser aluyimer 70 shi aruagi denogo, ta kasa sangdong nung shia lir.

DBC nung 41buba Freshers Day mungogo

Dimapur, Yimpoksüi/ November 06, 2021 (TYO): Honibarnü, Discipleship Bible College (DBC)-i "Here I am, Lord" omen nung ajemdaker college campus nung 41buba Freshers Day sentong agia liasü, ta sangdong ajanga metetdaksü.

Iba Freshers sentong nung, DBC, chairman, board of governors, Dr. T Lima Jamir-i, freshers dang pei nukjidong nung rangloksü, lennir tajung ka ka akümtsü asoshi meranga inyaksü aser pei dak temulung lema aser tasüita inyaksü; aser pei nukjidong meteta alitsü asoshi ajungshia liasü.

Kechisa inyakdir, Tsüngrem nem bendanga agütsür inyaksüla, ajiastünungang taküm nung takok angutsü, ta pai telok ajungmeso.



Dr. T Lima

Pei wadang tembanga inyaksü asoshi meranga azüngtsüla aser lokti nung temelenshi adokdaksütsü asoshi pei angazükbatem nübur dang sayutsüla, ta pai freshers ayongzük.

Freshers tenung nung Merennungsang-i o jembia aser kaketshir tenung (old students) nung Amekali P Asumi-i o jembia liasü.

Maneni, iba sentong nung M Div II kaketshirtemi choreography ka sayu, Achumdi ajanga special presentation agütsü aser Pentong, Sharyong aser Metnyei nungeri entertainment achaayanga agiogo.

Iba sentong nungsa, DBC, Principal, Rev S Wati Aier-i freshers atema sarasademtsü.



Kohima, Yimpoksüi/November 06, 2021: Swachhta Hi Seva Campaign shilem ama, Hokolbarnü National Service Scheme (NSS) unit Dr. Neilhouzhu Kire GHSS Kohima-i school compound nung merükmejuba sentong agiogo. Iba sentong ya Rukuvoyi Swuro, Programme Officer NSS-i anir agia liasü. Iba School indang Vice Principal, Rose Chishi-i 'social service' indang ambassador ama inyaksü asoshi NSS volunteer tem ayongzük aser merükmejuba yimya nung anidaksü aser ibaji mapa agi inyaka sayutsü asoshi volunteer tem ajungshio.

Head Hunters-i 21buba NSF Martyrs Memorial Trophy kokogo



Kohima, Yimpoksüi/November 06, 2021: 21buba NSF Trophy takok angur team - Head Hunters den Advisor Medo Yhokha, NSF aser ASU ketdangsürtem külemi tangokba noksa ka yangi angur.

Kohima, Yimpoksüi/November 06, 2021 (TYO): Honibarnü, 164 TA Battalion Naga Heart & Home indang Head Hunters Football Club-i 21buba Naga Students' Federation (NSF) Martyrs Memorial (football) Trophy kokogo. Iba asayamung ya Angami Students' Union (ASU) ajanga Indira Gandhi Stadium nung ayongzüka liasü, ta sangdong ajanga metetdaksü.

Iba asayamung final nung, Head Hunters aser Mhakenyi Kro-u na asaya liasü. Iba final asaya tenzüker minute 27buba nung Head Hunters captain Haotingmang Thompson-i goal ka idaktsü aser iba goal ajanga parnoki 21buba NSF Martyrs Memorial Trophy koktet.

Takok angur team - Head Hunters nem senpet lakh 2 den takok marok aser citation agütsü. Kasa mapang, runner-up team - Mhakenyi Karo-u

nem senpet lakh 1.20 agütsü. Kasa asayamung semi-final nung tamakok angur team ana Berenike FC Meriema aser FIFA FC napronglai senpet 30,000 (30,000 each) agizük. Ano, quarter-final nung tamakok angur team tem - Phesama Youth Organisation, Mele FC, Viswemi FC aser A Yhome FC nem senpet 15, 000 (15,000 each) agüja liasü.

Maneni, individual prize (sen 10,000) aser citations angurtem yamai alitsü:

- * Highest scorer - Yhunshalo Kemp of Mhakenyi Kro-u with 15 goals.
- * Best Custodian: Ruokuovolie Phewhuo of Berenike FC Meriema.
- * Best Defender: Moirangthan Jayam of FIFA FC.
- * Best mid-fielder: Asito Krose of Mhakenyi Kro-u Head Hunters nungi

Haotingmang Thomson-i 'Player of the tournament award' naroküm angur aser pa nem two-wheeler scooty ka agütsü.

Iba asayamung shibangba sentong nung, Nagaland Minister for Housing and Mechanical Tongpang Ozukum, shibai taoba mapang NSF president ama inyak, pa alakteta tejaoker ama dena liasü.

Tongpang Ozukum-i, football ya alima ajungai jangjaa aliba saisapong ka lir ta ashi aser küm shia NSF trophy asayamung takok ngua ayongba atema pai ASU dang pelaba metetdaksü.

Advisor for Technical Education and Elections, Medo Yhokha-i takok angurtem nem sempet agüja liasü.

Taküm, October 06, 2021 nungi 21buba NSF Martyrs Memorial Trophy asayamung tenzüker aser Manipur aser Nagaland nungi team 52 agi iba asayamung nung shilem agiogo.

NWA-i National Wrestling nung medal angurtem nem tenüngsang agütsü



Kohima, Yimpoksüi/November 06, 2021 (TYO): 9buba All India Traditional Wrestling aser Pankration Championship, koba October 29 nungi 31, 2021 tashi Goa nung asaya liasü, iba asayamung nung takok angur Naga wrestler 20 atema, Honibarnü Nagaland Wrestling Association (NWA)-i tenüngsang agütsüba sentong ka ayonga agiogo.

Iba asayamung nung Naga nung wrestler temi gold 10, silver 7 aser bronze 3 den sema medal 20 ngua liasü.

NWA President Dr Hiabe Zeliang-i, Naga wrestler temi tenüng tajung bener arutsüba yong, tanü iba sentong agir, ta ashi.

"Tanü, nenok sempet ajanga State nem tenüng tajung bener arutsüogo. Nenoki takok tulu ajangzüktetba yong State tenüng ajangkettsür," ta Dr Zeliang-i ashi.

Iba takok kisüng nung metaloker malitsüla, saka tarutsü nunga tajungtiba shilem agitsü asoshi maneni meranga inyaktsüla, ta pai ashi.

"Temaba jenjang

ajangzüktettsü atema asenoki meranga inyaktsü aser takok tajungba atema wrestler temi maneni meranga asayatsüla," ta pai metetdaksü.

Saisapong ya tajangzüker aliba industry ka kümdar aser saisaponger tajungbo linük indang ambassador ka akümer, kechiyong takok tajung angur saisapongertemi linük ajangkettsütsü aser tenüng tajung bener arutsü akok, ta pai ashi.

All India Traditional Wrestling aser Pankration Federation vice president, Mosonyi Domeh-i, iba championship nung State 23 nungi wrestler temi shilem agiogo aser iba asayamung nung Naga nung wrestler temi teshimtet category nung shilem agiaka, parnoki medal aika nguogo, ta metetdaksü.

Pai, Naga wrestler tem dang United World Wrestling nung shilem agitsü nükjidong yur meranga asayatsü asoshi ajangshia liasü.

Domeh-isa, State Sorkar dang wrestling wadang nung temulung agütsütsü aser iba den külemi

wrestlers aser NWA tem nungitta yaritsü asoshi ayongzüker.

9buba All India Traditional Wrestling & Pankration Championship nung medal angurtem (Naga Wrestler) yamai alitsü:

- * **Senior Men belt wrestling:**
 1. 100 + kg Gold - Keduoville Zumu; Silver Surhoneyi Soho
 2. 85+ kg Gold - Venuzo Dawhuo; Silver Mezivil Kiso
 3. 85- kg Gold - Kevizhakho Suokhrie; Silver Vekutho Soho
 4. 76- KG Gold - Seyiejalie Gwirie; Silver - Keneiselie Khawakhrie & Bronze - Thechamo Murry.
 5. 65- kg Gold - Vevotso Lase; Silver - Rokokehie Khawakhrie.
 6. 59- kg Gold - Rokovotuo Khawakhrie; Silver - Vizoseu Metha & Bronze - Itingchi
 7. 54- kg Gold - Kutho Luruo
 8. 49- kg Gold Bongtang phom
- * **Mas wrestling men:**
 1. 49- kg Gold Bongtang phom
 2. 100+ kg Bronze Keduoville Zumu.
- * **Women senior Belt Wrestling** 56- kg silver Vekhonieli Curha
- * **Women mas wrestling** 56- kg Gold Vekhonieli Curha

Syed Mushtaq Ali Trophy: Nagaland-i Mizoram kokogo

Dimapur, Yimpoksüi/November 06, 2021 (TYO): Honibarnü, Syed Mushtaq Ali Trophy asayamung nung ACA Stadium, Vijayawada kübok Nagaland aser Mizoram na tsüngda asaya liasü, ta sangdong ajanga metetdaksü.

Mizoram-i toss koka Nagaland nem batting lemzüksü. Nagaland team pur kanga mejungi asaya tenzüker, kong HM Ralte (Mizoram) ajanga innings indang mezüng ball nung opener aser Captain Jonathan Rongsen out sütsü. Joshua aser Mundhe nati melungi junga asaya liasü, saka tenati run 34 yanglur aliba mapang, Dika Ralte-i Joshua run out sütsü.

Iba sülen, Chetan Bist (26 runs) den Mundhe longjemer run 63 bendenloktsü. Mundhe-i run 76 yanglua liasü. Hem-i ball 14 nung run 25 yangluba ajanga Nagaland-i run 156/5 yanglutet.

Tanabuba innings nung, Mizoram-i run 39 agi alizüng metongtet aser batter 5 tashi out süadok.

Nagaland atema Nagaho, Mundhe, Khrievitso Kense aser Imliwati nungeri wicket ka ka agia liasü.

*** Senior Women's One Day Trophy 2021-22**

Kasa anogo, Senior Women's One Day Trophy asayamung nung, Nagaland-i Bihar madak

run 67 agi takok nguogo.

Nagaland-i toss koka batting asütsü shim aser team-i over 43.5 nung run 148 dang yanglutet aser asayar ajak out süadok.

Nagaland atema batter Gautami Naik-i run 70 (not out) aser Poonam Khemnar-i run 32 yanglua liasü.

Bihar atema Aarya-i wicket 3, Apurva aser Puja nati wicket anana agi.

Tanabuba innings nung, Nagaland team-i over 28.3 nung Bihar batter ajak out sütsü. Bihar team-i run 81 dang yanglutet. Nagaland atema Gautami Naik-i wicket 4 aser Poonam-i wicket 3 agi. Kasa team nungi Elina aser Kiran nati wicket ka ka agia liasü.

Iba takok ajanga point table nung Nagaland aser J&K na point kasa kümogo. Ajisiaka, iba asayamung league shilem taoba asaya ka nung Nagaland-i J&K makokba ajanga parnok Knock-Outs atema qualify mesütet.

Iba asayamung temzüng nung renema aliba ama, team tem point aser match takok anguba kasa shi aser iba team ana tanga league shilem nung asaya lira, match akokba team ji Group Point Table nung temaba jenjangi atutsü. Iba den bendenloksema, J & K Net Run Rate (+1.126) ya Nagaland Net Run Rate +1.021 dang tera agi tajungba liasü.

JYO-i 'All Nagaland Dr. Imkongliba Ao Memorial Open Volleyball Trophy' ayongzüksü

Dimapur, Yimpoksüi/November 06, 2021 (TYO): Japukong Youth Organisation (JYO) ajanga 2buba All Nagaland Dr. Imkongliba Ao Memorial Open Volleyball Trophy (Day & Night Match) asayamung ayongzüksü terenemba lir. Iba asayamung December 7 nungi 9, 2021 tashi DDSC Stadium, Dimapur nung asayatsü, ta sangdong ka ajanga JYO President, Limayanger Imchen-i metetdaksü.

Iba asayamung atema, Temjen Imna Along, Hon'ble Minister of Higher Education, Tribal Affairs Govt. of Nagaland, Tongti Tayonger (Chief Host) asütsü.

Tejangrar team temi November 30, 2021 tashi nung form agütsütsüla aser registration fee - sen 5000/- (Rupees five thousand) agi register asütsü mepishir.

Form temji VJ Coaching Centre Duncan, Dimapur, Kiran

Sport, Dimapur aser Capital Counter, Mokochung nung angutsü.

Iba Volleyball asayamung nung takok angur team nem senpet 125000/- (Rupees One lakh twenty five thousand), Runner-Up nem senpet, 75000/- (Rupees seventy five thousand), tasembuba jenjang nung takok angur nem senpet 30000/- (Rupees thirty thousand) aser pezübuba jenjang nung takok angur nem senpet 20000/- (Rupees twenty thousand) agütsütsü.

Ano, individual prize tem - "Player of the tournament" "Best Spiker" aser "Best Setter" shia nem senpet 10000/- (Rupees ten thousand) agütsütsü renema lir.

Iba asayamung dak sendakba nung osang tejangra agitsü atema ph.no:- 7005280962 / 6009231946 nung tongteprateptsü akok, ta kasa sangdong nung shia lir.

MLA Dr. Chumben-i sobaliba ... (TAPAK 1 NUNGI...)

"Tsüngsang - mopung melenshiba ajanga tarutsü nung alima tatsükba akümtsü. Meimchirtemi nakmati, totzü, gas atsükba aser ano mapa balala inyakba ajanga alima tatsükba kümdaktsür" ta pai tebilemtsü lemsatop.

Tarutsü ajungtsü atema asenoki süngdonglidong aser shirurutem aser arem-min wazüka ayutsüla, ta paisa

ayongzüker.

COVID-19 wara ajanga nisung ajak timtemer anungji Wokha district nung alir ajaki COVID-19 inyakyim benshitsu, ta Dr. Murry-isa shisem.

Iba sentong nung mendenji Lotha Hoho Secretary, Abenthung Ngullie liasü, Tsungki Village cultural group-i yartsüngsang ka ai aser Kumali Vontso-i sobaliba ken ka aten.

BILEMDANGANG

"Tetenlar teka meshitetaka tamshir teka menena lira ajak amajok."